



N° 7151
Entrée le 10.11.2022
Déclarée recevable
Président de la Chambre des Députés
(s.) Fernand Etgen
Luxembourg, le 10.11.2022

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 10. November 2022

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Justizminister an den Här Policeminister weiderzeleeden.

Déi lescht Méint huet den traurege Phenomen vun de Messerattacken zu Lëtzebuerg massiv zougeholl. Et sief ënner anerem op dës Beispiller higewisen:

- am Februar gouf eng Persoun bei enger Attack an der Stad am Garer Quartier blesséiert;
- am Mäerz koum et a follgenden Uertschaften zu Attacken: zu Bouneweg mat engem Blesséierten, zu Déifferdeng mat zwee Blesséierten, um Lampertsbiërg mat zwee Blesséierten, am Zentrum vun der Stad mat engem Blesséierten;
- am Mee ee Blesséierte bei enger Attack zu Monnerech an der Escher Strooss;
- am Juni eng Attack an der Stad am Garer Quartier mat engem Blesséierten;
- am Juli eng Attack op der Stater Gare mat engem schwéier Blesséierten;
- am September eng Attack an der Stad am Garer Quartier mat zwee Blesséierten;
- am Oktober eng Attack op der Gare zu Bierchem an op der Stater Gare mat jeeeweils engem Blesséierten, souwéi eng Attack um Sennengerbiërg op enger Bushaltestell mat engem schwéier Blesséierten;
- de 7. November goufen zwee Jugendlecher bei enger Messerpickerei an engem Bus schwéier blesséiert;

Och an eisen Nopeschlänner Däitschland a Frankräich gëtt d'Problematik vun de Messerattacken aktuell vill diskutéiert, och well dës Attacken ëmmer méi brutal ginn. An engem Artikel deen den 13. Juni um Zitt vum WDR publizéiert gouf, heescht et am Bezuch op d'Lag am Bundesland NRW: *"Erst seit 2019 führt die Polizei Messerangriffe als eigene Kategorie der Gewalttaten auf. Deutlich wird aber bereits: Täter sind zu 90 Prozent Männer, jeder zweite war vergangenes Jahr unter 30 Jahre alt, 42 Prozent der Täter sind nicht-deutsch"*.

An deem Zesammenhang géif ech der Regierung gär dës Froe stellen:

- 1) Kann d'Regierung hir Aschätzung vun der entsprecherender Sécherheetslag elaboréieren?
- 2) Wéi vill Attacke mat Stéchwaffe goufe bis ewell 2022 insgesamt zu Lëtzebuerg registréiert?
- 3) Kann d'Regierung matdeelen, wéi wäit sech beim Täterprofil Parallelen zu NRW erginn, respektiv, wéi dacks déi an NRW identifizéiert Krittären sech och an eise Statistiken néierschloen?
- 4) Kann d'Regierung matdeelen, ewéi eng Afferprofiler bis ewell identifizéiert goufen an op et hei geschlechtsspezifesch Ënnerscheeder gëtt, respektiv op Mannerjäreger besonnesch betraff sinn?

- 5) Kann d'Regierung matdeelen, ob dës Entwécklung am Zesummenhang mat der Ausbreedung vu brutale Jugendbande steet, déi déi leschte Méint fir vill negativ Schlagzeile gesuert hunn?
- 6) Kann d'Regierung matdeelen, wéi vill vun de Messerattacken, déi säit dem 1. Januar zu Lëtzebuerg vun der Police opgeholl goufen am öffentlechen Transport stattfonnt hunn?
- 7) Kann d'Regierung matdeelen, wéi eng Moosnamen elo ergraff ginn, fir dëser traureger Entwécklung ze begéinen?

Mat déiwem Respekt,



Fred Keup
Deputéierten



Gemeinsam Äntwert vun der Madame Justizministesch Sam Tanson a vum Här Policeminister Henri Kox op d'parlamentaresch Fro n°7151 vum 10. November 2022 vum honorabelen Deputéierten Fred Keup iwwert Messerattaken

Et ass utile drop ze verweisen, dass ee Groussdeel vun den Äntwerten op dës parlamentaresch Fro schonn an änlech orientéierte parlamentaresche Froen ze fannen ass, ënner anerem an der QP 3588 vum 05.02.2021, der QP 5493 vum 12.01.2022, der QP 6040 vum 07.04.2022, der QP 6488 vum 14.07.2022, an der QP 6534 vum 22.07.2022.

1. Kann d'Regierung hir Aschätzung vun der entsprecherender Sécherheetslag elaboréieren?

Och wann déi an dëser parlamentarescher Fro opgezielte Beispiller grav Delikter mat extrem wäitreechende Konsequenze fir all Bedeelegter duerstellen, ass et wichteg eng Analyse vun den Tendenzen op der Basis vun de Statistiken ze féieren.

D'Joersstatistik vun der Police, déi am Prinzip Ufank Mäerz vum nächste Joer presentéiert gëtt, an déi vun de Justizautoritéiten, wäerten et erlaben sech kënnen e Bild vun der Evolutioun vun alle Gewaltdelikter an eisem Land am Joer 2022 ze maachen.

2. Wéi vill Attacke mat Stéchwaffe goufe bis ewell 2022 insgesamt zu Lëtzebuerg registréiert?

Wéi schonn an den Äntwerten op déi uewe genannte parlamentaresch Froen, ënner anerem an der QP 5493, erkläert, sinn d'polizeilech a geriichtlech Datebanken net drop ausgeluecht, fir automatiséiert Recherchen op e spezifeschen Modus operandi vun enger Strofdot duerchzuféieren.

3. Kann d'Regierung matdeelen, wéi wäit sech beim Täterprofil Parallelen zu NRW erginn, respektiv, wéi dacks déi an NRW identifizéiert Krittären sech och an eise Statistiken néierschloen?

4. Kann d'Regierung matdeelen, ewéi eng Afferprofiler bis ewell identifizéiert goufen an op et hei geschlechtsspezifesch Ënnerscheeder gëtt, respektiv op Mannerjäreger besonnesch betraff sinn?

5. Kann d'Regierung matdeelen, ob dës Entwécklung am Zesammenhang mat der Ausbreedung vu brutale Jugendbande steet, déi déi leschte Méint fir vill negativ Schlagzeile gesuert hunn?

Wéi bei der 2. Fro erkläert, erlaben d'Datebanken zu Lëtzebuerg keng sou automatiséiert Recherche.

6. Kann d'Regierung matdeelen, wéi vill vun de Messerattaken, déi säit dem 1. Januar zu Lëtzebuerg vun der Police opgeholl goufen am öffentlechen Transport stattfonnt hunn?

Wei schonn an den Äntwerten op d'parlamentaresch Froe 5493 vum 12. Januar 2022 a 6040 vum 07.04.2022 erkläert ginn ass, kënnen d'Police an d'Justizautoritéite keng detailléiert Zuelen zu Messerattaken an engem spezifeschen Ëmfeld, sief hei am öffentlechen Transport, liwweren.



7. Kann d'Regierung matdeelen, wéi eng Moosnamen elo ergraff ginn, fir dëser traureger Entwécklung ze begéinen?

D'Police huet d'Missioun, mat deene legale Moyene déi hier zur Verfügung stinn fir d'Erhale vun der öffentlecher Uerdnung an d'Sécherheet vum Bierger ze suergen. Dowéinst suivéiert d'Police kontinuéierlech d'Virfäll um nationalen Territoire, fir bei neie Phenomener adaptéiert Mesuren zum Schutz vun de Bierger kënnen ze ergräifen am Aklang mat bestoende Gesetzer.

Et sief dobäi bemierkt, dass net all Messer an d'Kategorie vun de verbuedene Waffe fält. D'Police kann eréischt aktiv ginn, wann d'Messer am Kader vun enger Strofdot benotzt ginn ass.

Am Fall vun enger legaler Waff, d.h. enger Waff, déi éischtens net ënnert d'Kategorie vun de verbuedene Waffe fält, zweetens autorisationspflichteg ass, an drëttens och beim Waffeservice vum Justizministère ugemellt ass, kann de Justizministère jidderzäit de Waffeschäin zeréckzéien oder suspendéiere wann déi néideg Konditiounen fir de Waffeschäin net méi erfëllt sinn (z.B. wann sech géif erweisen, dass d'Persoun eng Gefor fir sech oder anerer duerstellt).

Och dierf d'Police net ouni Gronn Persounen duerchsichen.

Wat d'Sécherheet am öffentlechen Transport betrëfft, do ass d'Police, sou wéi schonn an eiser Äntwert op d'parlamentaresch Fro 6040 vum 07. Abrëll 2022 erkläert gouf, vill aktiv an applizéiert och hei d'Prinzipie vum Suivi vun den Incidenten a Reaktivitéit.

Fir zu dësem Punkt vollstänneg ze sinn, verweise mir och nach op eis Äntwert op d'parlamentaresch Fro 6534 vum 22. Juli 2022.

Lëtzebuerg, den 13 Dezember 2022.

D' Justizministesch

(s.) Sam Tanson